


欽定古今圖書集成

方輿彙編職方典



欽定古今圖書集成方輿彙編職方典
第四百四十五卷目錄
河南府部雜錄

職方典第四百四十五卷

河南府部雜錄

水經注河水又西逕陝縣故城南注又合一水謂之
瀆谷水南出近溪北流注橐其水又西北逕陝城西
西北入於河河北對茅城故茅亭茅戎邑也公羊曰
晉敗入大陽者也津亦取名焉春秋文公三年秦伯
伐晉自茅津濟封嶠尸而還是也東則咸陽澗水注
之木出北虞山南至陝津注河河南卽陝城也昔周
邵分伯以此城爲東西之別東城卽虢邑之上陽也

號仲之所都爲南號三號此其一焉其大城中有小城故焦國也武王以封神農之後於此王莽更名黃眉矣戴延之云城南倚山原北臨黃河縣水百餘仞臨之者咸悚惕焉西北帶河水湧起方數十丈有物居水中父老云銅翁仲所投處又云石虎載經於此沈沒二物並存水所以湧所未詳也或云翁仲頭髻常出水之漲減恆與水齊晉軍當至髻不復出今唯見水異耳嗟嗟有聲聲聞數里按秦始皇二十一年長狄十二見於臨洮長五丈餘以爲善祥鑄金人十

二以象之各重二十四萬斤坐之宮門之前謂之金狄皆銘其胷云皇帝二十六年初兼天下以爲郡縣正法律同度量大人來見臨洮身長五丈足六尺李斯書也故衛恒叙篆曰秦之李斯號爲工篆諸山及銅人銘皆斯書也漢自阿房徙之未央前俗謂之翁仲矣地皇二年王莽夢銅人泣惡之念銅人銘有皇帝初兼天下文使尚方工鑄滅所夢銅人膺文後董卓毀其九爲錢其在者三魏明帝欲徙之洛陽重不可勝至霸水西停之漢晉春秋曰或言金狄泣故畱

古今圖書集成
之石虎取置鄴宮苻堅又徙之長安毀二爲錢其一未至而苻堅亂百姓推置陝北河中於是金狄滅除以爲鴻河巨瀆故應不爲細梗躓湍長津碩浪無宜以微物屯流斯水之所以濤波者蓋史記所云魏文侯二十六年號山崩壅河所致耳獻帝東遷自夕潛渡墜坑爭舟舟指可掬亦是處矣

洛水又東北過河南縣南注周書稱周公將致政乃作大邑成周於中土南繫於洛水北因於邾山以爲天下之大湊孝經援神契曰八方之廣周洛爲中謂

之洛邑竹書紀年晉定公二十年洛絕於周魏襄王九年洛入成周山水大出

又東過洛陽縣南伊水從西來注之注洛陽周公所營洛邑也故洛誥曰我卜瀍水東亦惟洛食其城方七百二十丈南繫於洛水北因於邾山以爲天下之湊方六百里因西爲千里春秋昭公二十三年晉合諸侯大夫成周之城故亦曰成周也遷自序云太史公畱滯周南摯仲治曰古之周南今之洛陽漢高祖始欲都之感婁敬之言不日而駕行矣屬光武中

古今圖書集成
興宸居洛邑逮於魏晉咸兩宅焉故魏略曰漢火行
忌水故去其水而加佳魏爲土德土水之牡也水得
土而流土得水而柔除佳加水

又東過偃師縣南注緱氏原開山圖謂之緱氏山也
亦云仙者昇焉言王子晉控鶴斯阜靈王望而不得
近舉手謝而去其家得遺屣俗亦謂之爲撫父堆堆
上有子晉祠或言在九山非此世代已遠矣莫能辨
之劉向仙傳云世有簫管之聲焉

穀水又東過河南縣北東南入於洛注河南城西北

穀水之右有石磧磧南出爲死穀北出爲湖溝魏太
和七年暴水流高三丈此地下停流以成湖渚造溝
以通水東西十里決湖以注瀍水穀水又逕河南王
城北所謂成周矣公羊曰成周者何東周也何休曰
名爲成周者周道始成王所都也地理志曰河南河
南縣故郟鄏地也京相璠曰郟山名鄏地邑也十年
定鼎爲王之東都謂之新邑是爲王城其城東南名
曰鼎門蓋九鼎所從入也故謂是地爲鼎中楚子伐
陸渾之戎問鼎於此述征記曰穀洛二水本於王城

古今圖書集成
東北合流所謂穀洛鬪也今城之東南缺千步世又謂之穀洛鬪處俱爲非也余按史傳周靈王之時穀洛二水鬪毀王宮王將竭之太子晉諫王不聽遺堰三堤尚存左傳襄公二十五年齊人城邾穆叔如周賀韋昭曰洛水在王城南穀水在王城北東入於瀍至靈王時穀水盛出於王城西而南流合於洛兩水相格有似於鬪而毀王城西南也潁容之著春秋條例言西城梁門枯水處世謂之死穀是也始知緣生行中造次入關經究故事與實違矣考王封周桓公

於是爲西周及其孫惠公封少子於鞏爲東周故有東西之名矣秦滅周以爲三川郡項羽封申陽爲河南王漢以爲河南郡王莽又名之曰保忠信鄉光武都洛陽以爲尹尹正也所以董正京畿率先百郡也穀水又東流逕乾祭門北子朝之亂晉所開也東至千金竭河南十二縣境簿曰河南縣城東十五里有千金竭洛陽記曰千金竭舊堰穀水魏時更修此堰謂之千金竭積石爲竭而開溝渠五所謂之五龍渠渠上立竭竭之東首立一石人石人腹上刻勒云太

古今圖書集成
和五年二月八日庚戌造築此塌更開溝渠此水衡
渠上其水助其堅也必經年歷世是故部立石人以
記之云爾蓋魏文帝修王張故績也塌是都水使者
陳協所造也語林曰陳協數進阮步兵酒後晉文王
欲修九龍堰阮舉協文王用之掘地得古承水銅龍
六枚堰遂成水歷塌東注謂之千金渠逮於晉世大
水暴注溝瀆泄壞又廣功焉石人東脅下文云太始
七年六月二十三日大水并瀑出常流上三丈蕩壞
二塌五龍泄水南注瀉下加歲久漱齧每澇卽壞歷

載消棄大功今故爲今塌更於西開泄名曰代龍渠
地形正平誠得爲泄至理千金不與水勢激爭無緣
當壞由其卑下水得輸上漱齧故也今增高千金於
舊一丈四尺五龍自然必歷世無患若五龍歲久復
壞可轉於西更開二塌二渠合用二十三萬五千六
百九十八功以其年十月二十三日起作工重人少
到八年四月二十日畢代龍渠卽九龍渠也後張方
入洛破千金塌公私賴之水積年渠塌頽毀石砌殆
盡遺基見存朝廷太和中修復故塌按千金塌石人

古今圖書集成
西脅下文云若溝渠久疏深引水者當於河南城北石磧西更開渠北出使首孤立故溝東下因故易就磧堅便時事業已訖然後見之加邊方多事人力苦少又渠竭新成未患于水是以不敢預修通之若於後當復興功者宜就西磧故書之于石以遺後賢矣雖石磧淪敗故跡可憑準之于文北引渠東合舊瀆舊瀆又東晉惠帝造石渠於水上按橋西門之南頰文稱晉元康二年十一月二十日改治石巷水門除堅枋更爲函枋立作覆枋屋前後辟級續石障使南

北入岸築治漱處破石以爲殺矣到三年三月十五日畢記并紀列門廣長深淺於左右巷東西長七尺南北龍尾廣十二丈巷瀆口高三丈謂之罽門橋又潘岳西征賦曰秣馬罽門卽此處也穀水又東又結石梁跨水制城西梁也穀水又東左會金谷水水出大白原東南流歷金谷謂之金水東南流逕晉衛尉卿石崇之故居也石季倫金谷詩集叙曰余以元康七年從太僕出爲征鹵將軍有別廬在河南界金谷澗中有清泉茂樹衆果竹柏藥草蔽翳西北角築之

古今圖書集成
謂之金墉城魏文帝起層樓於東北隅晉宮閣名曰金墉有崇天堂卽此地上架木爲榭故曰樓矣皇居創徙宮極未就止蹕于此構宵榭于故臺所謂臺以亭亭也南曰乾光門夾建兩觀觀下列朱桁於塹以爲御路東曰含春門北有退門城上西面列觀五十步一睥睨屋臺置一鐘以和漏鼓函北連廡蔭墉北廣榭炎夏之日高歡常以避暑爲淶水池一所在金墉者也穀水逕洛陽小城北因阿舊城憑結金墉故向地也未嘉亂結以爲壘號曰洛陽壘故洛陽記曰

陵雲臺西有金市金市北對洛陽壘者也又東歷大夏門下故夏門也陸機與弟書云門有三層高百尺魏明帝造門內東側際城有魏文帝所起景陽山餘基尚存孫盛魏春秋曰黃初元年文帝愈崇宮殿雕飾觀閣取白石英及紫石英及五色大石于太行穀城之山起景陽山於芳林園樹松竹草木捕禽獸以充其中于是百役繁興帝躬自掘土率羣臣三公以下莫不展力山之東舊有九江陸機洛陽記曰九江直作員水水中作員壇三破之夾水得相逕通賦曰

古今圖書集成
濯龍芳林九谷八溪芙蓉覆水秋蘭被畦今也山則
塊阜獨立江無復髣髴矣渠水又東枝分南入華林
園歷疏圃南圃中有古玉井井悉以珉玉爲之以錙
石爲口工作精密猶不變古璨焉如新又瑤華宮南
歷景陽山北山在都亭堂上結方湖湖中起御坐石
也御坐前建蓬萊山曲池接筵飛沼拂席南面射侯
夾席武峙背山堂上則石路崎嶇巖嶂峻嶮雲臺風
觀纓繡帶阜遊觀者升降耶閣出入虹陛望之狀冕
沒鸞舉矣其中引水飛翠傾瀾瀑布或枉渚聲溜潺

潺不斷竹柏蔭於層石繡薄叢於泉側微颺暫拂則
芳溢于六空又爲神居矣其水東注天淵池池中有
魏文帝九花叢殿基悉是洛中故碑壘之今造釣臺
于其上池南置魏文帝茅茨堂前有茅茨碑是黃初
中所立也其水自天淵池東出華林園逕聽訟觀南
故平望觀也魏明帝常言獄天下之命也每斷大獄
恆幸觀聽之以太和三年更從今名觀西北接華林
隸簿昔劉楨磨石處也文士傳曰文帝之在東宮也
宴諸文學酒酣命甄后拜坐坐者咸伏唯劉楨平仰

觀之太祖以為不敬送徒隸簿後太祖乘步牽車乘城降關本注關恐是閱字之譌簿作諸徒咸敬而植獨坐磨石

不動太祖曰此非劉楨耶石如何性楨曰石出荆山元巖之下外炳五色之章內秉堅貞之志雕之不加文磨之不加瑩稟氣真正稟性自然太祖曰名豈虛哉復為文學池水又東流於洛陽縣之南池池即故狄泉也南北百十一步東西七十步皇甫謐曰悼王葬景王于翟泉今洛陽太倉中大家是也春秋定公元年晉魏獻子合諸侯之大夫於翟泉始盟城周班

固服虔皇甫謐咸言翟泉在洛陽東北周之墓地今按周威烈王葬洛陽城內東北隅景王塚在洛陽太倉中翟泉在兩塚之間側廣莫門道東建春門路北路即東宮街也於洛陽為東北後秦封呂不韋為洛陽十萬戶侯大其城并得景王塚矣是其墓地也及晉永嘉元年洛陽東北步廣里地陷有二鵝出蒼色者飛翔冲天白色者止焉陳畱孝廉董養曰步廣周之狄泉盟會之地今色蒼北象矣其可盡言乎後五年劉曜王彌入洛帝居平陽陸機洛陽記步廣里在

古今圖書集成
洛陽城內宮東是狄泉所在不得於太倉西南也京
相璠與裴司空彥季修晉輿地圖作春秋地名亦言
今太倉西南地水名狄泉又曰舊說言狄泉本自在
洛陽北萇弘成周乃繞之杜預因其一證必是狄泉
而卽實非也後遂爲東官池晉中州記曰惠帝爲太
子出聞蝦蟆聲問人爲是官蝦蟆私蝦蟆侍臣賈引
對曰在官地爲官蝦蟆在私地爲私蝦蟆令曰若官
蝦蟆可給廩先是有讖云蝦蟆當貴昔晉朝收愍懷
太子於後池卽是池也其一水自大夏門東逕宣武

觀憑城結構不更層墉左右夾列步廊參差翼跂南
望天淵池北矚宣武場竹林七賢論曰王戎幼而清
秀魏明帝于宣武場上爲欄苞虎阱使力士袒裼迭
與之搏縱百姓觀之戎年七歲亦往觀焉虎乘間薄
欄而吼其聲震地觀者無不辟易顛仆戎亭然不動
帝於門上見之使問姓名而異之場西故賈充宅地
穀水又東逕廣莫門北漢之穀門也北對芒阜連嶺
修垣苞惣衆山始自洛口西踰平陰悉芒龍也魏志
曰明帝欲平北芒令登臺見孟津侍中辛毗諫曰若

古今圖書集成
九河溢湧洪水爲害丘陵皆夷何以禦之帝乃止穀
水又東屈而逕建春門石橋下卽上東門也阮嗣宗
詠懷詩曰步出上東門者也一曰上升門晉曰建陽
門百官志曰洛陽十一門候一人六百石東觀漢記
曰郅惲爲上東門候光武嘗出夜還詔開門欲入惲
不內上令從門間識面惲曰火明遼遠遂拒不開由
是上益重之亦袁本初挂節處也橋首建兩石柱橋
之右柱銘云陽嘉四年乙酉壬申詔書以城下漕渠
東通河濟南引江淮方貢委輸所由而至使中謁者

魏郡清淵馬憲監作石橋梁柱敦敕工匠盡要妙之
巧攢立重石纍高周距橋工路博流通萬里云云河
南尹邳崇隗丞渤海重合雙福水曹掾中牟任防史
王蔭史趙興將作吏睢陽申翔道橋掾成罕卑國洛
陽令江雙丞平陽降監掾王騰之主石作左北平山
仲三月起作八月畢成其水依柱文自樂里道屈而
東出陽渠昔陸機爲成都王穎入洛敗北而返水南
卽馬市也舊洛陽有三市斯其一也嵇叔夜爲司馬
昭所害處也北則白社故里也昔孫子荆會董威輦

于白社謂此矣以同載爲榮故有威輦圖又東逕馬市石橋橋南有二石柱並無文刻也漢司空漁陽王梁之爲河南也將引穀水以溉京都渠成而水不流故以坐免後張純堰洛而通漕洛中公私懷瞻是渠今引穀水蓋純之創也按陸機洛陽記劉澄之末初記言城之西面有陽渠周公制之也昔周遷殷民於洛邑城隍偏狹卑陋之所耳晉故城成周以居敬王秦又廣之以封不韋以是推之非專周公可知矣亦謂之九曲瀆故河南十一縣簿云九曲瀆在河南鞏

縣西西至洛陽又按傅暢晉書云都水使者陳良鑿運渠從洛口入注九曲至東陽門是以阮嗣宗詠懷詩所謂朝出上東門遙望首陽岑又言遙遙九曲間徘徊欲何之者也陽渠水南暨閭闔門漢之上西門者也漢宮記曰上西門所以不純白者漢家厄於戊故以丹鏤之太和遷都徙門南側其水北乘高渠枝分上下歷故石橋東入城逕望先寺中有碑碑側法子丹碑作龍矩勢於今作則佳方古猶劣渠水又東歷故金市南直千秋門右宮門也又枝流入石逗伏

流注靈芝九龍池魏太和中皇都遷洛陽經構宮極
修理街渠務窮隱發石視之嘗無毀壞又石工細密
非今之所擬亦奇爲精至也遂因用之其一水自千
秋門南流逕神虎門下東對雲龍門二水衡楸之上
皆列雲龍風虎之狀以火齊薄之及其晨光初起夕
景斜輝霜文翠照陸離眩目又南逕通門掖門西又
南流東轉逕閭闔門南案禮王有五門謂臯門庫門
雉門應門路門路門一曰畢門一曰虎門也魏明帝
上法太極于洛陽南宮起太極殿于漢崇德殿之故

處改雉門爲閭闔門昔在漢世洛陽宮殿門題多是
大篆言是蔡邕諸子自董卓焚宮殿魏太祖平荊州
漢吏部尚書安定梁孟皇善師宜官八分體求以贖
死太祖善其法常仰繫帳中愛翫之以爲勝宜官北
宮榜題咸是鵠筆南宮旣建明帝令侍中京兆韋誕
以篆書之皇都遷洛始令中書舍人沈含馨以隸書
書之景明正始之年又敕符節令江式以大篆易之
今諸桁榜題皆是式書周官太宰以正月懸治法於
象魏廣雅曰闕謂之象魏風俗通曰魯昭公設兩觀

於門是謂之闕從門歛聲爾雅曰觀謂之闕說文曰闕門觀也漢官典職曰偃師去洛四十五里望朱雀闕其上鬱然與天連是明峻極矣洛陽故宮名有朱雀闕白虎闕蒼龍闕北闕南宮闕也東觀漢記曰更始發洛陽李松奉引車馬奔觸北闕鐵柱門二馬皆死卽斯闕也白虎通曰門必有闕者何闕者所以飾門別尊卑也今閭闔門外夾建巨闕以應天宿雖不如禮猶象魏之上而加復思以易觀矣廣雅曰復思謂之屏釋名曰屏自障屏也孳思在門外孳復也臣

將入言事于此復重思之也漢末兵起壞園陵孳思曰無使民復思漢也故鹽鐵論曰垣闕孳思言樹屏隅角所架也穎容又曰闕者上有所失下得書之于闕所以求論譽于人故謂之闕矣今闕前水南道右置登聞鼓以納諫也昔黃帝立明堂之議堯有衢室之問舜有告善之旌禹有立鼓之訊湯有總街之誹武王有靈臺之復皆所以廣設過誤之備也渠水又枝分夾路南逕出太尉司徒兩坊間謂之銅駝街舊魏明帝置銅駝諸獸於閭闔南街陸機云駝高九尺

古今圖書集成
卽出太尉坊者也水西有末寧寺熙平中始創也作
九層浮圖浮圖下基方一十四丈自金露梓下至地
四十九丈取法代都七級而又高廣之雖二京之盛
五都之富利刹靈圖未有若斯之構按釋法顯行傳
西國有爵離浮圖其高與此相狀東都西域俱爲莊
妙矣其地是曹爽故宅經始之日於寺院西南隅得
爽窟室下入地可丈許地壁悉壘方石砌之石作細
密都無所毀其石悉入法用自非曹爽庸匠亦難復
制此桓氏有言曹子丹生此豚犢信矣渠左是魏晉

故廟地今悉民居無復遺墉也渠水又西歷廟社之
間南注南渠廟社各以物色辨方周禮廟及路寢皆
如明堂而有燕寢焉唯祧廟別無後代通爲一廟列
正室於下無復燕寢之制禮天子建國左廟右社以
石爲主祭則希冕今多王公攝事王者不親拜焉咸
陵元年洛陽大風帝社樹折青氣屬天元王東渡魏
社代昌矣渠水自銅駝街東逕司馬門南魏明帝始
築闕崩壓死數百人遂不復築故無闕門南屏中舊
有置銅翁仲處金狄旣淪故處亦禡唯壞石存焉自

此南直宣陽門經緯通達皆列馳道往來之禁一同
兩漢曹子建嘗行御街犯門禁以此見薄渠水又東
逕杜元凱所謂狄泉北今無水坎方九丈六尺深二
丈餘似是人工而不類於泉陂是驗非之一證也又
皇甫謐帝王世紀云王室定遂徙居成周小不受王
都故壞翟泉而廣之泉源既塞明無故處是驗非之
二證也杜預言翟泉在太倉西南既言西南於雒陽
不得爲東北是驗非之三證也稽之地說事幾明矣
不得爲翟泉也渠水歷司空府前逕太倉南東出陽

門石橋下注陽渠穀水逕閭闔而南土山東水西三
里有坂坂上有土山漢大將軍梁冀所成築土爲山
植林成苑張璠漢記曰山多峭坂以象二峭積金玉
採捕禽獸以充其中有人殺苑兔者迭相尋逐死者
十三人南出逕西陽門舊漢氏之西明門也亦曰雍
門矣舊門在南太和中以故門卯出故徙是門東對
東陽門穀水又南逕白馬寺東是漢明帝夢見大人
金色項佩白光以問羣臣或對曰西方有神名曰佛
形如陛下所夢得無是乎於是發使天竺寫致經像

始以榆櫨盛經白馬負圖表之中夏故以白馬爲寺名此榆櫨後移在城內愍懷太子浮圖中近世復遷此寺然金光流照法輪東轉創自此矣穀水又南逕平樂觀東李尤平樂觀賦曰乃設平樂之顯觀章祕偉之奇珍華嶠漢書曰靈帝於平樂觀下起大壇上建十二重五采華蓋高十丈壇東北爲小壇復建九重華蓋高九丈列奇兵騎士數萬人天子住大蓋下禮畢天子躬擐甲稱無上將軍行陣三匝而還設祕戲以示遠人故東京賦曰其西則有平樂都場示遠

之觀龍雀蟠蜿天馬半漢應劭曰飛廉神禽能致風氣古人以良金鑄其形明帝永平五年長安迎取飛廉并銅馬置上西門外平樂觀今於上西門外無他基觀惟西明門外獨有此臺巍然廣秀疑卽平樂觀也又言皇女稚殤埋於臺側故復名之曰皇女臺晉灼曰飛廉鹿身頭如雀有角而蛇尾豹文董卓銷爲金用銅馬徙於建始殿東階下北軍喪亂此象遂淪穀水又南達西門門故廣陽門也門左枝渠東派入城逕木社前又東逕太廟南又東於青陽門右下注

古今圖書集成
陽渠穀水又南東屈逕津陽門南故津陽門也昔洛水泛洸漂落害者衆津陽城門校將築以遏水諫議大夫陳宜止之曰王遵臣也水絕其足朝廷中興必不入矣水乃造門而退穀水又東逕宣陽門南故苑門也皇都遷洛移置於此對閭闔門南直洛水浮桁故東京賦曰沂洛背河左伊右瀍者也夫洛陽考之中土卜唯洛食實爲神也門左卽洛陽池處也池東舊平城門所在矣今塞北對南陽南宮故蔡邕曰平城門正陽之門與宮連屬郊祀法駕所由從出門之

最尊者洛陽諸宮名曰南宮有諼臺臨照臺東京賦曰其南則有諼門曲榭依阻城洫注云諼門冰室門也阻依也洫城下池也皆屈曲邪行依城池爲道故說文曰隍城池也有水曰池無水曰隍矣諼門卽宣陽門也門內有宣陽冰室周禮有冰人日在北陸而藏之西陸朝覲而出之冰室舊在宣陽門內故得是名門旣壅塞冰室又罷穀水又逕靈臺北望雲物也漢光武所築高六丈方二十步世祖嘗宴於此臺得走鼠於臺上亦諫議大夫第五子陵之所居倫少子

也以清正洛陽無主人鄉里無田宅寄止靈臺或十日不炊司隸校尉南陽左雄尚書廬江朱孟興等故孝廉功曹各致禮餉並辭不受宋建中卒穀水又東逕平昌門南故平門也又逕明堂北漢光武中元元年立尋其基構上圓下方九室重隅十二堂蔡邕月令章句同之故引水於其下爲壁雍也穀水又東逕開陽門南晉宮閣名曰故建陽門也漢官儀曰開陽門始成未有名宿昔有一柱來在樓上琅琊開陽縣上言南城門一柱飛去光武皇帝使來識視良是遂

監傳之刻記年月日以名焉何湯仲弓嘗爲門候上微行夜還湯閉門不內朝廷嘉之又東逕國子太學石經北周禮有國學教成均之法學記曰古者家有塾黨有庠遂有序國有學亦有虞氏之上庠下庠夏后氏之東序西序殷人之左學周人之東膠虞庠王制云養國老於上庠養庶老於下庠故有太學小學教國之子弟焉謂之國子漢魏以來置太學於國子堂東漢靈帝光和六年刻石鏤碑載五經立於太學講堂前悉在東側蔡邕以嘉平四年與五官中郎將

堂谿典光祿大夫碑議郎張訓韓說太史令單颺等奏求正定六經文字靈帝許之邕乃自書丹於碑使工鐫刻立於太學門外於是後儒晚學咸取正焉及碑始立其觀視及筆寫者車乘日千餘兩填塞街陌矣今碑上悉銘刻蔡邕等名魏正始中又立古篆隸三字石經古文出於黃帝之世倉頡本鳥跡爲字取其孳乳相生故文字有六義焉自秦用篆書焚燒先典古文絕矣魯恭王得孔子宅書不知有古文謂之科斗書蓋因科斗之名遂效其形耳言大篆出於周

宣之時史籀創著平王東遷文字乖錯秦之李斯及胡毋敬有改籀書謂之小篆故有大篆小篆焉然許氏字說專釋於篆而不本古文言古隸之書起于秦代而篆字文繁蕪會劇者故用隸人之省謂之隸書或云卽程邈于雲陽增損者是言隸者篆捷也孫暢之嘗見青州刺史傅弘什說臨淄人發古塚得銅棺前和外隱爲隸字言齊太公六世孫胡公之棺也唯三字是古隸同今書證知隸自出古非始于秦魏初傳古文出邯鄲淳石經古文轉失淳法樹之于堂西

古今圖書集成
石長八尺廣四尺列石于其下碑石四千八枚廣三十丈魏文帝又刊典論六碑附於其次陸機言太學贊別一碑在講堂西下列石龜碑載蔡邕韓說高堂谿等名太學弟子贊復一碑在外門中今二碑並無石經東有一碑是漢順帝陽嘉八年立碑文云建武二十七年造太學年積毀壞未建六年九月詔書修太學刻石記年用工作徒十一萬二千人陽嘉九年八月作畢南面刻頌表裏鏤字猶存不破漢石經北有晉辟雍行禮碑是太始二年立其碑中折但世代

不同物不停故石經淪缺存半毀幾駕言未久諒用撫焉考古有三雍之文今靈臺太學並無辟雍處晉末嘉中王彌劉曜入洛焚毀二學尚髣髴前基矣穀水于城東南隅枝分北注逕清陽門東故清明門也亦曰稅門也亦曰芒門又北逕東陽門東故有東門也又北逕故大倉西洛陽地記曰大城東有大倉倉下運船常有千計卽是處也又北入洛陽溝穀水又東左迤爲池又東右出爲方湖東西一百九十步南北七十步故水衡署之所在也穀水又東南轉屈而

東注謂之阮曲云阮嗣宗之故居也穀水又東注鴻池陂百官志曰鴻池池名也在洛陽東二十里丞一人二百石池東西千步南北千一百步四周有塘池中又有東西橫塘水溜逕通故李尤鴻池陂銘曰鴻澤之陂聖王所規開水東注出自城池也其水又東左合七里澗晉後略曰成都王使吳人陸機為前鋒都督伐京師輕進為治軍所處大敗于鹿苑人相登躡死于塹中及七里澗澗為之滿即是澗也澗有石梁即旅人橋也昔孫登不欲久居洛陽知楊氏榮不

保終思欲遜跡林鄉隱淪忘死楊駿埋之于此橋之東駿後尋亡矣搜神記曰太康末京洛始為折楊之歌有兵革辛苦之辭駿後被誅太后幽死折楊為之應也凡是數橋皆累石為之亦高壯矣制作甚佳雖以時往損功而不廢行旅朱超石與兄書云橋去洛陽宮六七里悉用大石下員以通水可受大舫過也奇制作題其上云太康三年十一月初就功日用七萬五千人至四月未止此橋經破落復更修補今無復文字陽渠水又東流逕漢廣野君酈食其廟南廟

古今圖書集成
在北山上成公綏所謂偃師西山也山上舊基尚存
廟宇東面門有兩石人對倚北石人曾前銘云門亭
長石人西有二石闕雖經頽毀猶高丈餘闕西卽廟
故基也基前有碑文字剝缺不復可識子安仰澄芬
于萬古讚清徽于廟像文字厥集矣陽渠又東逕亳
殷南昔盤庚所遷改商曰殷此始也班固曰尸鄉故
殷湯所都者也故亦曰湯亭薛瓚漢書注皇甫謐帝
王世紀並以爲非以爲帝嚳都矣晉太康地理記並
言田橫死于是亭故改曰尸鄉非也余按司馬彪郡

國志以爲春秋之尸氏也其澤野負原夾郭多墳隴
焉卽陸士衡會王輔嗣處也袁氏王陸詩叙機初入
洛次河南之偃師時忽結陰望道左右民居者因往
退宿見一少年姿神端遠與機言元機服其能而無
以酬折前至一辯文機題緯古今綜檢名實此少年
不甚欣解將曉去稅駕逆旅嫗曰君何宿而來自東
數十里無村落上有山陽王家墓機乃怪悵還睇昨
路空野昏霾雲攢蔽日知所遇者審王弼也此山卽
祝雞翁之故居也搜神記曰雞翁者洛陽人也居尸

古今圖書集成
鄉北山下養雞百年餘雞至千餘頭皆有名字欲取呼之名則種別而至後之吳山莫知所去穀水又東逕偃師城南皇甫謐曰帝嚳作都于亳偃師是也王莽之所謂師氏者也穀水又東流注于洛水矣雲仙雜記洛陽人家正旦造絲雞葛燕粉荔枝正月十五日造火蛾兒食玉梁餠寒食裝萬花輿煮楊花粥端午木羹艾酒以花絲樓閣插鬢贈遺辟瘟扇乞巧使蜘蛛結萬字造明星酒裝同心膾重九迎涼脯羊肝餅佩癭木符冬至煎餈綵珠戴一陽巾除夜銅

刀刻門埋小兒硯點水盆燈臘日造脂花餽

洛陽梨花時人多攜酒其下曰爲梨花洗粧或至買樹

談苑藝祖載誕營中三日香人莫不驚異至今洛中人呼應天禪院爲香孩兒營

墨莊漫錄陝州大河南岸有物如鐵石狀謂之鐵牛舊有祠宇唐末封號順正廟大中祥符四年真宗祀汾陰幸其廟作鐵牛詩

畫墁錄禹貢曰砥柱析城至于王屋峽府三門是也

古今圖書集成
絕河流若巖牆然鑿爲三門河經其中東洋如小城
狀卽析城也禹廟在西渾有寺下望砥柱上百步屹
然中流高數百丈銘勒其上但取稍平處或險處互
布昌一峯之間其字方可尺餘魏公撰文正字薛純
稷之子也每欲印榻伺天氣晴明先維舟砥下下梯
而陞上數日不可竟俯視洪流足酸目眩用是難得
眞本元符中大水壞三門一夕寺廟皆失略無孑遺
銘亦失數十字

唐家二百八十餘年河決二穀洛城歲爲患攘天津
浸宮闕墊城郭不已本朝無五年不河決而穀洛之
患殊稀洛中耆舊言伊洛水六十年一泛濫自祥符
至熙寧中自福善坡以北率被昏墊公私蕩沒富公
晏夫人尚無恙也倉卒以浴桶濟之而沈水退死者
衆多婦人簪珥皆失多有脫腕之苦城下惟福善坡
不及城外惟長夏門不及洛中故有語云長夏門外
有莊福善坡頭有宅平日但知以其形勢耳至此乃
知水讖不苟云

鄰畿雜誌洛陽北有山泉卽湯所禱桑林之地有廟

古今圖書集成
卽太乙之祠俗號爲聖王近因旱中使請禱得雨乃
奏請封爲清淵侯失于檢詳地志致此謬

聞見前錄洛中形勢邠山在西邠山在北成臯在
東以接嵩闕塞直其南屬女几連荆華至終南山洛
水來自西南伊水來自南右澗水左瀍水隋文帝登
邠山對闕塞而歎曰真天闕也今之洛城也周公所
卜在其西北邠山相屬定鼎於邠是也前臨
澗洛二水故曰穀洛鬪將毀王宮也洛誥曰我又卜
瀍水東亦惟洛食東漢洛陽是也今在洛城之東十

八里跨洛水前直轘轅北屬邠山極平遠西晉後魏
皆都焉晉又築金墉城在其西北其山川秀潤有餘
形勢雄壯差不逮長安

太平御覽洛陽地圖曰鞏在洛水之間鞏固也言四
面有山可以鞏固也

陸機洛陽記曰洛陽有銅駝街漢鑄銅駝二枚在宮
南西會道相對俗語曰金馬門外集衆賢銅駝陌上
集少年

水經曰伊水東北過伊闕昔大禹疏龍門以通水兩

山相對望之如闕伊水歷其間謂之伊闕
十道志曰壽安縣漢宜陽縣也

陝州陝郡禹貢豫州之域周爲二伯分陝之地卽古
虢國地戰國時屬韓秦併天下屬三川郡史記曰周
成王時召公爲三公自陝以西召公主之自陝以東
周公主之

虢州弘農郡禹貢豫州之域春秋爲虢地七國時秦
韓之境秦併天下爲山川郡漢元鼎中置弘農郡
戴延之西征記曰函者道形如函也孫卿子曰秦有

松柏之塞是也

帝皇世紀曰虢有三焉周興封虢仲於西虢此其地
也封虢叔於東虢卽成臯是也今陝郡平陸縣是北
虢

郡國縣道記曰盧氏西虢之別也

遁甲開山圖曰盧氏山宜五穀可以避水災因山以
名縣

讀史訂疑靈寶之西函谷之東有澗直下黃河曰弘
農澗大明一統志載之云宋避英宗諱改爲鴻蘆澗

余竊疑宋爲太祖父諱弘殷耳何必並農字改之英宗初名及後更名俱不犯二字以爲英宗者尤誤也後閱王得臣塵史始知其大謬不然得臣曾修陝志云靈寶之西有澗曰洪溜不知其名之因也比見水經云縣有鴻臚圍池是水津渠沿注故謂斯川爲鴻臚澗於是知洪溜語之訛也灑然始悟當時俗名是洪溜原非弘農所謂鴻臚者卽得臣援證水經修志時改之耳彼自云鴻臚非云鴻蘆也得臣政和時年八十所著書正當英宗前後何嘗有避諱之說乎蓋

陝州古名弘農而是澗先名洪溜後名鴻臚其聲近於弘農措大強解事遂以意傅會其說以爲復古而名之事固有雅而非真者予故拈出之以雪斯澗之誤名今靈寶人亦順呼爲弘農無有知其非者仍當稱鴻臚爲是不然稱洪溜猶是宋以前語也

河南府志紀才燧人氏四佐曰明由曰必育曰成博曰隕丘按陶潛集聖賢羣輔錄燧人四佐燧人出天四佐出洛宋均曰出天天所生也出洛地所生也由明由曉升級謂等差政所先後也必育受稅俗謂受賦

稅所宜施為也成博受古諸謂古諸侯職等也隕丘受延嬉嬉典也主授此錄也寓洛陽盟人李氏根曰圖書之前有燧人四佐焉史書其名而未言所產至晉陶潛氏始標宋均之言曰四佐出洛且各註所職某事竊謂靖節好古博學其言必有所據且四佐所職犁然六卿之事古相業實從此啓今史乘雖未載而河洛人物之首舍四佐其誰

周仲山甫洛人吉甫作詩美之曰保茲天子生仲山甫又曰袞職有闕仲山甫補之

晉劉宏字終嘏兄粹字純嘏弟演字冲嘏並在中朝世人語曰洛中有三嘏焉

唐燕公張說自中書舍人拜工部侍郎子均自中書舍人拜禮部侍郎孫濛自中書舍人拜禮部侍郎時人謂三代同遷

宋歐陽永叔張堯夫尹師魯楊子聰梅聖俞張大素王幾道時人謂洛中七友

呂蒙正字聖功諡文穆呂夷簡字坦夫諡文靖呂公著字晦叔諡正獻揮塵錄曰呂文穆相太宗猶子文

靖叅眞宗政事相仁宗文靖子惠穆爲英宗樞副爲仁宗樞使次子正獻爲神宗知樞相哲宗正獻孫舜徒爲太上皇右丞相繼執七朝政眞盛事也時人謂三世宰相

呂晦叔司馬君實居洛號二龍

呂文靖公夷簡子公弼公著公亮公儒俱爲翰長

西洛有五相宅嘗有詩相賡和乃文潞公富相王相二張相也伊洛山水之秀士風之厚自昔卿相間出故語云吾鄉有宰相坊侍郎里

九老會序曰洛陽遺老李元爽年一百三十六甄權年一百三歲拜朝散大夫賜几杖太宗貞觀中常幸其家

邵伯溫言洛陽有老人曰黨翁者賣藥洛水南行步甚快自言五代清泰中嘗爲兵經事柴世宗有放停公帖可驗其衣服猶唐裝也有妻無子有問以前事者皆不答元豐中不知所在計其壽當一百八十餘歲

明劉澤演號嵩門曾任靜寧知州壽至一百歲有司

扁之爲中州人瑞焉

晉金谷會金谷園二十四友首潘岳次石崇左思陸
機陸雲郭彰劉琨歐陽建杜斌王粹鄒捷崔基劉環
周恢陳珍劉訥繆徵摯虞諸葛詮和郁牽秀許猛劉
與杜育皆一時才俊

唐香山會白居易曰會昌五年月日胡杲等之賢皆
多年壽予亦次焉予敝居履道坊合尚齒之會七老
相顧旣醉且歡靜而思之此會希有各賦七言一章
以記之其年夏又有二老年貌絕倫同歸故鄉亦來

斯會續命貫姓名年齒寫形附於圖右又有侍祕書
狄兼謨河南尹盧貞以年未及七十歲與會而不及
列前懷州司馬安定胡杲年八十九衛尉卿致仕馮
翌吉叟年八十八前磁州刺史廣平劉真年八十七
前龍武軍長史滎陽鄭據年八十五前侍御史內供
奉官范陽盧直年八十二前未州刺史清河張渾年
七十七刑部尚書致仕白居易年七十四會中後入
遺老李元爽年一百三十六禪僧如滿年九十五
宋耆英會元豐五年富韓公弼七十九文潞公彥博

古今圖書集成
七十七席司封汝言七十七王安之尚恭七十六趙
南正丙七十五劉伯壽几七十五馮肅之行己七十
五楚正敘建中七十二王不疑謹言七十二張昌言
問七十張景先壽七十王公拱辰七十司馬溫公光
未七十潞公素重其人用唐狄兼謨故事請與會
明澹逸會舉於萬曆中年與會者十一人侍郎王柱
峰正國叅正劉後峰衍祚尚書沈對泉應時副使劉
西塘贄都給事中謝岷陽江侍郎董李村堯封都御
史吳兩室三樂僉事戴龍州冕知府方古田時學呂

文田孔良按此會祇存職名其詩文皆不傳也
惇誼會朱嵩野所舉之會原名敦誼此會從心不從
文有深意存焉者也生不考信非誼後不講世非誼
有善不勸有過不規非誼羣公于此良有苦心所以
會自從心始也與會諸公侍郎王柱峯正國年六十
九歲副使劉西塘贄年六十八歲叅政劉後峰衍祚
年七十一歲知府楊沚泉士廉侍郎董李村堯封年
六十四歲知縣王同野職年六十歲主事史善言山
人胡竺西懷玉年四十七歲

古今圖書集成
初服會會名初服取以終成始之義皆少時同几硯
與舊遊友也或以事歸或以家居得白首相攜以樂
餘年真所謂全始而完終者也遂以命名訓導許巽
庵夢兆七十四歲教諭徐惠川大吉七十二歲副使
劉西塘贊六十八歲知州陳霽山銓六十三歲知縣
王同野職六十三歲解元劉臨谷慎五十三歲山人
胡竺西懷玉四十七歲詩僧有懷玉集若干卷行於
世

崇雅會坦然居士劉公衍祚舉於萬曆二十一年與

會者十有二人叅政劉後峰衍祚年九十四歲通判
周心伊自任知縣王同野職推官董龍陽繼祖主事
李敬庵贊知州劉嵩門澤演知縣張洪川其化知縣
陳時鳴東臯主事孫子源瀾通判李德仲希閔知州
張龍河獻圖郎中王瑞白金星

八者會有洛八者蚤以文武之材並用於時今老矣
倦於勤先後言旋惜茲暮景不能以無樂於是乎有
會題曰八耆會茲會也有故者不入志異者不入仕
者不入幼者不入耆而已矣都指揮僉事詹棟之椿

古今圖書集成
年七十有六戶部員外郎李叔重天倫年七十五戶部尚書孫文宿應奎年七十三四川保寧府同知于子野淳年七十二中書舍人劉汝思成學年六十七霍丘縣知縣李季勉天成年六十四兵部尚書王維賢邦瑞年六十四山西按察司僉事戴汝材梗年六十八王邦瑞有記

紀物雷琴洛陽董氏畜雷琴一中題云山虛水深萬籟蕭蕭古人無蹤惟石崖堯壯其聲也其外漆下隱有朱書云洛水多清幽崧高有白雲聖朝容隱逸時

得詠南薰

伽藍記曰魏白馬寺有大榴京師語曰白馬甜榴一石直牛

白馬寺浮圖前葡萄異於餘處枝葉繁衍子實甚大類於棗味殊美冠於中京至熟時帝取之或賜宮人宮人轉遺親識以爲奇異得者不肯輒食乃歷數家魏百果園中有仙人棗長五寸核細如鍼霜降乃熟食之甚美俗傳出崑崙山一日西王母棗勸學里內周國有園珍果出焉有含消梨重十觔從

古今圖書集成
根著地盡化爲水

白馬寺柰實重七觔

洛陽北邙張公夏梨海內唯一樹大谷梨潘岳賦
云張公大谷之梨洛都賦曰梨則大谷冬紫秋黃

魏華林園景陽山南有百果園果列作林林各有堂
有仙人桃其色赤表裏照徹得霜卽熟亦出崑崙山
亦曰西王母桃

韋述兩京記曰東都嘉慶坊有李其實甘鮮故稱嘉
慶李

李德裕平泉莊有剡溪之紅桂鍾山之月桂曲阿之
山桂永嘉之紫桂剡中之真紅桂東陽之牡桂

龍門敬善寺有紅桂樹云獨秀陳侍御因訪剡浮樵
客得數株移植郊園衆芳色沮乃知敬善所有徒得
嘉名

李德裕金松賦序云廣陵東南有顏太師猶子舊宅
其地則孔北海故臺余晚春游眺忽覩奇木枝似檉
松葉如瞿麥迫而察之則翠葉金實燦然有光訪其
名曰金松訊其所來曰得於天台乃就主人求得一

古今圖書集成
本列於平泉

平泉莊有珠子柏實如珠子聯生葉上香聞數十步
李德裕有柳柏賦謂其風姿濯濯宛若萑楊而冒霜
挺雪四時不改

平泉莊有雁翅檜婆娑羅樹河洛記曰洛陽北邙山
有古樗樹不知其來早晚婆娑周迴四五畝與伊闕
正南相當越公等建都城之日據此樹爲南北定准
嫌樗木名惡號曰婆娑羅樹

平泉莊有蓮房玉藥每跗萼之上上分五朶而實同

其一房也

贊皇公平泉莊其水物之美者有白蘋洲之重臺蓮
芙蓉湖之白蓮茅山東溪之芳蓀

咸寧四年立芳蔬園於金鋪城東多種異菜有菜名
曰芸芝類有三種紫色者最繁味辛其枝爛熳春夏
葉密秋藥冬馥其實若珠五色隨時而盛其色紫爲
上蔬其味辛色黃爲中蔬其味甘色青爲下蔬其味
鹹常以三蔬充御膳其葉可以資飲食以供宗廟祭
祀亦止人渴飢宮人採帶其莖葉者氣歷日不歇

龍門龕在府城南三十里兩山對峙東曰香山西曰龍門石壁峭立伊水中出又名伊闕壁間鑿石龕石佛大小千數皆後魏及唐時所鑿中有極大者三龕唐魏王泰爲長孫皇后所造岑文本有記

楚坑在新安縣西南項羽詐坑秦降卒處

土刹在永寧縣西北古崩關之塞垣後爲鎮

鐵人在陝州治內史記秦始皇鑄金人十二董卓毀其九爲錢所存者三石勒取置鄴苻堅又徙之未至而亂其一百姓推入河中今鼓樓下二人或其所遺

者

鐵牛在陝州城外黃河中首在河南尾在河北世傳禹鑄以鎮河患有廟

石柱在陝州世傳爲召公所立

藥爐在陝州開花寺世傳爲老君煉藥處

古柏在陝州儒學東世傳爲三皇廟中物其大合抱高八十尺盤折下垂枝幹交錯宛如雲龍信一奇觀也

稠桑在靈寶縣西二十里古桃林也春秋虢公敗戎

古今圖書集成
於桑田卽此

紀疑亳城舊志亳城在歸德府東南四十里爲契父
帝嚳所居蓋相傳者之誤立政曰商有三亳解者曰
一在洛州偃師縣西十里帝嚳都此是曰西亳一在
宋州穀熟縣西南二十五里湯都此是曰南亳其地
與葛伯爲鄰今寧陵之葛鄉卽其國也一在宋州北
五十里大蒙城湯受命之處是曰北亳今據鄭元孔
安國及括地志俱稱湯自商丘而遷蓋自南亳而徙
西亳書所謂從先王居是已至於盤庚渡河南遷則

又帝嚳之故都也故曰商之三都亳俱當以偃師爲
是

Blank page with vertical lines for text.

欽定古今圖書集成方輿彙編職方典

第四百四十六卷目錄

河南府部外編

Blank page with vertical lines for text.

職方典第四百四十六卷

河南府部外編

河南府志雜紀啓母化石嵩山之陽舊有啓母廟久廢廟前有石高二丈許而中裂號啓母石郡志載淮南子啓母塗山氏之女禹治洪水經轅轅山謂塗山氏曰欲餉聞鼓聲乃來禹跳石誤中鼓塗山來見禹乃化熊慙之而去嵩高山下化爲石禹曰歸我子石破而生啓蓋此石是何其誕也近世有引書及孟子語爲之辯者謂禹治水於其外其勤久矣不假塗山

古今圖書集成
之餉而後食而塗山安得隨其所之而餉之禹若化
爲異物何不避一世之人而獨避其所配耶一世之
人何不見而塗山獨見之而慙耶塗山慙禹之化熊
而不自慙於化石蓋好事者承訛踵妄轉相附會而
至是耳予聞登封又有所謂啓母墓者漢書注啓母
墓在陽城卽嵩山之陽今登封地然則此石爲啓母
此墓何爲者也玉女擣帛石在登封縣西北其石瑩
澈如玉

漢神桑願會寺佛堂前有桑樹一株直上五尺枝條
橫遶柯葉旁布形如羽蓋復高五尺又然凡爲五重
每一重葉椹各異京師道俗謂之神桑觀者成市帝
聞而惡之以爲惑衆命給事黃門侍郎元紀伐之其
日雲霧晦冥下斧之處流血至地見者莫不悲泣
投劍厭怪章帝以建初八年鑄一劍令投于伊水中
以厭人漆之怪弘景按水經云伊水有一物如人漆
頭有爪人浴輒沒不復出

魏腋下有兩翅魏明帝起凌雲臺峻峙十丈卽韋誕
白首處有人鈴下能著履登緣不異踐地明帝怪而

古今圖書集成
殺之腋下有兩肉翅長數尺

帝辛玉枕拾遺記曰魏咸熙二年宮中夜夜有異獸或吼呼驚人乃有傷害者詔使宦者暗中伺候有白虎毛色瑩淨以戈投虎卽中左目俄而往取虎已隱形更搜覓乃於藏中得一玉虎頭枕左目有血帝嗟其大異問諸大臣答云昔漢誅梁冀得玉虎頭枕一枚云此枕單池國所獻腮下有篆書字云是帝辛之枕嘗與妲己同枕是殷時遺寶也凡珍寶久則生精靈必神物憑之也

洛子淵虎賁洛子淵者云洛陽人戍在彭城其同營人樊元寶假歸附書令達其家云宅在靈臺南近洛河元寶至忽見一老翁云是吾兒書引入屋宇顯敞讓坐命婢取酒俄而酒至香美異常兼設珍羞海陸俱備飲訖送元寶出但見高岸對水淥波東傾及還彭城子淵已失矣方知是洛水之神也
王隱晉書蘇韶卒見形於蘇節求改葬曰吾性愛好京洛每往來出入瞻視邙山樂哉萬世之基也北背孟津洋洋之河南望天邑濟濟之盛

古今圖書集成
唐武宗初朱崖李太尉有樂吏廉郊師事曹鋼盡鋼之能郊嘗宿平泉別墅值風月清朗攜琵琶池上彈蕤賓調聞芰荷間有跳躍聲必謂是魚及彈別調卽無所聞復彈前調忽有一物鏘然躍出池岸之上視之乃蕤賓鐵律呂相應固如此

韋丹未第時於洛陽中橋見漁者得一大龜長數尺引頭四顧有乞救之意丹以乘驢贖之放於水中徒步而歸後數日韋詣胡葦生問命生共往元長史家有老人元濬之向韋盡禮款待懷中取文字一通授

之曰此公一生官祿行止聊報活命之恩方悟元濬之卽其龜也

鸚鵡求道東都有人養鸚鵡以其慧甚施於僧僧教之能誦經往往架上不言不動問其故對曰身心俱不動爲求無上道及死焚之有舍利

上苑天授二年臘卿相欲詐稱花發請幸上苑有所謀也許之尋疑有異圖乃遣使宣詔曰明朝遊上苑火急報春知花須連夜發莫待曉風吹於是凌晨名花布苑羣臣咸服其異后蓋託術以移唐祚此皆妖

古今圖書集成
妄不足信也大凡后之詩文皆元萬傾崔融輩爲之
按上苑卽今龍門花子寨是也

宋富鄭公留守西京因府園牡丹盛開召文潞公司
馬端明楚建中劉几康節先生同會是時牡丹一欄
凡數百本坐客曰此花有數乎請先生筮之旣畢曰
凡若干朶使人數之如先生言又問曰此花幾時盡
乎請再筮之先生揲著沉吟良久曰此花盡來日午
時鄭公因曰來日食後可於此以驗先生之言坐客
曰諾次日食罷花尚無恙洎烹茶之際忽然羣馬廐

中逸出與坐客馬相蹄嚙奔出花叢中旣定花盡毀
折矣聞之司馬文季朴富韓公謝事居洛一日邵康
節來謁公適病足臥小室延康節至臥牀前康節笑
曰他客得至此耶公亦笑指康節所坐胡牀曰病中
心怦怦雖兒子來立遣去此一胡牀惟待君耳康節
顧左右曰更取一胡牀來公問其故答曰日正中當
有一綠衣少年騎白馬候公公雖病強見之公薨後
此人當秉史筆記公事公素敬康節神其言因戒閤
人曰今日客至無貴賤立爲通旣午果范祖禹夢得

古今圖書集成
來遂入問勞稠疊且曰老病卽死念生平碌碌無足
言然粗懷朴忠他時筆削必累君願少留意夢得惶
恐叵測避席謝後十餘年修裕陵實錄夢得竟爲修
撰韓公傳

洛陽大內自隋唐五代久虛曠自金鑾殿後雖白晝
人不敢入入亦多有異蠱或大如斗蛇率爲巨蟒日
夜絲竹歌哭之聲不絕宣和末有監官吳本者武人
恃氣不畏夏月因納涼殿廡間至晡後天尚未昏黑
忽聞踵聲自內出卽有衛從繽紛中一人衣黃如帝

王狀胷間尚帶鮮血繇殿廡從本寓舍前徐行而過
本與從者急趨入戶避之得詳瞰焉最後一俊士似
怒本納涼妨其行者乃以兩手按其臥榻榻之四足
遂穿磚而陷於地轉他殿而去本因圖畫所見遍示
洛人皆曰必唐昭宗也

汲石化器晉有彭娥宜陽縣人永嘉之亂娥父母昆
弟皆爲賊所害時娥方負器出汲聞賊至走還與賊
格鬪賊執娥驅出溪邊將污之溪邊有峭壁高數十
丈娥大呼曰我豈受辱於賊奴耶遂以首觸石山忽

古今圖書集成
開丈餘娥卽趨入賊逐之山復合賊皆磔死娥遂不知所在所遺汲器化爲石形似鷄人因號爲石鷄山云

嵇康聞琴嵇康嘗遊洛西暮宿華陽亭引琴而彈之夜分忽有客詣之與康共談音律詞致清辨因爲廣陵散聲調絕倫遂以授康仍誓不傳人及康就東市索琴彈之曰昔袁孝尼嘗從吾學廣陵散吾每靳與之于今絕矣

展草救主昔有人牽狗過鞏縣野酒醉臥地不醒忽野火四面延燒東二里有河狗因往濕身展草救火免患方醒狗走疲而死因瘞縣西南羅口保人稱爲義狗塚

種蔬得玉洛陽公輦水作漿兼以給過者且補屨不取其直有神化爲童子問公何不種蔬曰無種卽遺數升公種之化爲白璧公取以娶婦

晤王弼墓陸機初入洛次河南之偃師時夕望道左若有民居因往投宿見一年少神姿端達與機言易理妙旨機心欽其能無以酬對旣曉便去機稅驂逆

古今圖書集成
旅嫗曰此東數十里無村落止有山陽王家墓耳機
乃怪之悵然還睇前路空野霾雲拱木蔽日知所遇
者信王弼墓也

女媧墓移天寶十一載六月閩鄉縣黃河濱女媧墓
因大雨晦冥失所在乾元二年六月瀕河人聞有風
雷曉見其墓湧出上有巨石石上雙柳時號風陵堆
蓋女媧亦風姓也

瘞蠶受刑咸通中洛陽大饑穀價湧貴時養蠶者多
以桑葉貨之新安人有王公直一日與妻謀曰養蠶

不如鬻葉遂取蠶瘞之公直入洛陽鬻葉得錢市猪
肉一脚盛于袋中鮮血流出閭吏將袋啓視見人臂
一隻遂縛公直送河南郡守訊之公直不服只稱鬻
葉云云郡守令左右押公直驗瘞蠶之處乃見死人
無一臂覆勘相合公直遂下獄尋杖殺之

鴻瀾呈祥河南府伊闕前臨大溪每僚佐有人臺則
水中先有小灘漲出時牛僧孺爲縣尉一旦忽報灘
出翌日宰邑與同僚列筵於亭上觀之有老吏云此
必分司御史若是西臺灘上當有鴻瀾飛下不數日

拜西臺御史

出使日密也與同密候公等上歸之自之史云出
 木中表亦小職天出者中會潛為無位一日忽路獨
 獨謝是種所請取增國而編大歸令於對亦人治也
 無一得對臨命公自益不慈慈封爵以
 葉云云得長命式亦得公自益不慈慈封爵以
 一安邊際公而致所南林片所之入前不顯只解濟
 肉一編編子從中歸血飛出開更神家想斷野人解
 不取謂其表那黨表之公自入治國海東醫發市滌

